

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

IUNI 2026

email: sulusamoa@cccs.org.ws -Main Office: Ph. 24414, Ext 29 - website: www.cccs.org.ws

MALUMALU FOU, EFKS PAPA PULEIA



MAOTA o le GALUEGA, EFKS AVATA, FALEALUPO



O LE FAASINO UPU

1. O LE LAUGA	2
2. LAUGA (2) OFISA TUTOTONU	3
3. FAAMOLEMOLE IA AMANAIA	4
4. EFKS AVATA, FALEALUPO	5
5. EFKS PAPA PULEIA	6
6. MO TUPULAGATALAVOU	7
7. O I'A MAILE UPEGA	8
8. NA O AFIGA E TULEI MAI	12
9. O E UA MALILIU:	14
(i) SILAULELEI TAITO TOOMALATAI	
(ii) TI'A PAULI FOTUAAUPULE	
10. ATA O MATAUPU LOMIA	16

O LE LAUGA

TUSIFAITAU: 2 Samuelu 12: 1-10

MATUA: 7e & 9, “O loo faapea ona fetalai mai o le Alii le Atua o Isaraelu, O a’u lava na ou faau’uina oe e fai ma tupu o Isaraelu; o a’u foi, na laveai ia te oe ai le lima o Saulo; (fuaiupu e 9) Se a le mea ua e inoino ai i le afiga a le Alii, ua e fai ai le mea leaga i ona luma? Ua e fasioti ia Uria le sa Heti i le pelu, ua e aumai foi lana avā e fai mau avā, a o ia ua e fasia i le pelu o le fanauga a Amoni.”

MANATU AUTU: FA’AAOGA SESĒ LE PULE (abuse of power).

O le fa’aaogā sesē o le pule, ua mautinoa lava ua sasao fa’aafi i lo tatou lalolagi. A o le a le uiga o lea faamatalaga? Faaagā sesē le pule; abuse of power. ABUSE OF POWER. Means using authority, position, privilege, leadership or influence in a wrong way for selfish gain, control, oppression, or harm to others. O le fa’aaogaina o tulaga ma tofiga, fa’aaogaina o le pule, fa’aaogaina o le malosi po o le mamalu ua i se tagata, e saili ai ona manuia. Fa’aaoga le pule e sauā ai i isi tagata.

A lē usitai i le pule, e avea le pule lea ma auupega, o se meatau e faaleaga ma faasala ai isi uso a tagata. A e ua manino lava tala a le foafoaga a le Atua, (Kenese 1;27) “Ona faia lea e le Atua o le tagata i lona faatusa, na faia e ia le tane ma le fafine. Ua faamanuia ia te i laua “ia fanafanau ma uluola

ia tumu ai le lalolagi.” O le Atua ma Lona faamatalaina, o Mataupu silisili e uiga i le Atua, ua tu mātila ma iloga ai le mamalu, ma le faaeaina o le tagata. O ana tofiga ma valaauina mo le tagata o le mea ua mautinoa, e tautua ma auauna e faatupu ma faaolaola lana siosiomaga ma le lalolagi, e pei o lona finagalo, a e le o le fa’aaoga sesē.

O Tusi a Samuelu ma ona talaaga fai mai o taimi faigata ia ia Isaraelu. Taimi na fuafua ai le nuu o le Atua e fai ni tupu. O tusitusiga la a le tusitala, o fesootaiga mai taimi o faamasino, ma mafauauga na tutupu a’e ina ia faia ni tupu mo le nuu. O taimi ma tusitusiga a Samuelu, ua faai’uina ai taimi o faamasino, o lona tulai mai, o le faau’uina o Saulo e fai ma tupu muamua. O le aveesea o Saulo ma le tulai mai o Tavita e fai ma tupu. A o le tala ia Tavita ma lona tulai mai, fai mai o le filifiliga e mai le loto o le Atua.

E pei o le autu atoa lea o le Tusi, e ui o le a faia tupu, a e pei ua toe faailoa, o le Atua o le Tupu moni lea mo Isaraelu. O le taitaiga e faatatau ma fitoitonu i le mata’u ma usitai i le Atua, aemaise o le galue mai o le Atua e tauala i ana auauna filifilia. E pei o le tala sa faitauina. O le auina atu o Natano sei toe faapupula le mamalu ma le paia, o le pule a le Atua na faamamalu ai lana auauna o Tavita. Ua malamalama le tala lea ia Tavita ma Patesepa, o loo faamatala mai le mataupu e 11 ma fa’aaau mai i le mataupu e 12 sa faitauina le vaega muamua. O le feiloaiga a Natano ma Tavita o le finagalo o le Atua sei faailoa ia Tavita lana mea na fai. O le faamatalaina o le tala faa-faataoto i le mauoa ma le tagata mativa, o se tala faatusa i le mafau fau o le perofeta, sei lagonaina ma sufi le loto o Tavita pe lagonaina le alofa moni na tuu e le Atua i lona loto. Le faamaoni, le poto ma le atamai na faamanuia ai le Atua i lona fai ma tupu ia Isaraelu.

O le mea ua mautinoa, e lē o galo ia Tavita meaalofo a le Atua. O ia o le tagata mauoa, o ia o le tagata mamalu, o ia o le pule i le nuu uma, e faatusa i le va tapuia ma le isi tagata, e pei o le tagata mativa. A o le mea ua tupu, e tataua ona fai i ai se faamasinoga tonu. Ma le lilo i ona manatu e lē o lilo lana mea na fai i le silafaga paia a le Atua. Ua lava lana faamasinoga o le tagata mauoa ma le tagata mativa e ta’u mai ai i le faafofoga ma le silafaga paia a le Atua, o loo ia faataua tagata uma, ui ua agasala. Ua tautala i le oti o le tagata mauoa ua ia ave le mamoe a le tagata mativa, a o ia e taui atu i mamoe e 4 i le tagata mativa.

Faamasinoga tonu a le Atua e saili ai le tagata, po o fea o loo i ai lona mafau, ma le tamaoiga a le Atua na ia te ia. Ua tautino lava e tataua ona oti le tagata ua fa'aaoga sesē le pule, a e faaola le tagata amiotonu. A o le Atua e telegese lona toasa a e vave lona alofa. Fai mai Natano, o oe Tavita, o oe lava le tagata, o le tali o fuaiupu o le tatou matua. Ua fetalai mai le Alii le Atua o Isaraelu, o a'u lava na faauuina oe e fai ma tupu o Isaraelu, o a'u foi na ou laveai ia te oe ai le lima o Saulo. O le toe faailoa atu o le mamalu ma le pule na foai e le Atua, ua galo ia Tavita. F8 o le ata atoa o le tagata mauoa. O le pule o le tamaoiga o le malosi o le ola faaeaina, a o le feagaiga lava lea na osi e faaopopo atu ma tului atu manuia, auā o le loto atoa o le Atua na ia filifilia ai Tavita e fai ma tupu. A e aisea ua inoino ai i le Atua? Aisea ua fai ai le leaga i ona luma? Ua e fao le avā ma fasioti Uriā le tane a Patesepa. Ua toe foi i lagona ma manatu faaletagata.

Ua maua loa mea e tele soona fai le ola. E uu loa le pule le alofa loa i le uso, fa'aaoga sesē le pule ma le manatu o Tavita e lē o silafia e le Atua. O le taunuuga ma le tau i le lē alofa, o leaga na oo i lona aiga e faavavau, e oo i le tama na fanau mai na oti. Peitai na faamaulalo ma faatoese Tavita i luma o le Atua i ona sesē. Fai mai a ia, *Ua ou agasala lava i le Alii...o le tali a Natano ...ua aveeseina lau agasala e le Alii, e te lē oti ai...* O le alofa tunoa ma le mutimutivale o le Atua. Ioe, o pule uma lava e mai le Atua, lona uiga e faatonutonu mai e le alofa tunoa o le Atua a tatou feau ma galuega o loo fai nei. O i tatou na faia mai le faatusa o le Atua. Sa tatou tautino foi i luma o le Atua ua fai ma tautoga le ola ua faaekalesiaina, o le tiakono, o le a'oa'o, o le faifeau. O valaauina foi i galuega, ma ni tulaga ua i ai.

O le alofa lena o le Atua. O le upu ma le tala masani lava, e lē lilo i lalo tatou mea e fai i le silafaga a le Atua. O fua tatou te lūlū, tatou te selesese foi. O le avanoa na salamō ai le tupu o Tavita i ona sesē, na faafogaina e le Atua. O le faamasinoga tonu lea a le Atua i le taunuuga o le mea na fai e Tavita. Peitai e se'i le fao ua iloga le mea na tu ai. E tutupu mala i le lio o le aiga i le mutinitini o le la, e faailoa i luma mea e tutupu. A o le mea sili i le pule a le tupu ua ia salamō ma faafogaina ai lana faatoesega. O le pule tatou te faia ai mea tonu uma. O lo tatou malosi ia fa'aaogaina e fesoasoani ai e laveai ma tausoa ni mea mamafa o le galuega. A e le o le pule e te saga

faamamafa ai i lou uso. Na oo a i Lona Alo o Lana lava lea Pule ina ia malie e togiola le lalolagi agasala. O le pule e amiotonu, o le pule alofa, na oo i le manumalo e ala i le toe soifua mai o Iesu, o le faaitaiga sili lea mo i tatou; ia manumalo i faaosoosoga ma tofotofoga uma, ma ia o tatou iloa lana Pule Aoao. AMENE.

Saunia susuga Korīa Matamu FS
EFKS Ulutogia, Pulega Aleipata
Matagaluega LOTOFAGA LEPA ALEIPATA

O LE LAUGA (2)

Tusi Faitau: Galuega 11:1 – 18

Matua: Galuega 11: 16-17, *“¹⁶Ona ou manatua lea o le afioga a le Alii, ua faapea mai, Na papatiso lava loane i le vai, a e papatisoina outou i le Agaga Paia. ¹⁷O lenei afai e tusa le alofa ua foaiina mai ia te i tatou atoa ma i latou, ina ua faatuatua i le Alii o Iesu Keriso, o ai ea a'u nei ou te mafaia ona vavao atu i le Atua?”*

Manatu Autu: MASALOMIA LE FAAMAONI O PETERU (PETER'S INTEGRITY IS DOUBTED)

Aisea ua masalomia ai le faamaoni o Peteru? E lua lava ni mafuaaga e ono masalomia ai se tagata. Muamua, o le lē faamaoni o lena tagata. Ma lona lua, o le lē faamaoni o se faamatalaga, po o ni upu, o loo ia faia. A o Peteru o le tasi lenei o soo o Iesu, ma o se soo e faamaoni i ana galuega faapea ana faatinoga. O le Tusi o Galuega a le Au Aposetolo lea sa faitauina nai fuaiupu i lenei taeao, o se Tusi o faamaumauga o galuega tala'i, faapea ma le faatalaleleiina o le lalolagi, aemaise lava i Asia ititi, i le senituri muamua TA (Tausaga o le tatou Alii). O se Tusi foi o loo faamatala ai le Afio A'e o Iesu i le lagi ina ua toe tu mai le oti, ma le auina mai o le Agaga Paia ia i latou uma sa potopoto i lea taimi i Ierusalem.

O nisi o tagata taua o le Tusi o Galuega, o le aposetolo o Paulo, ma le faamatalaga auiliili o ana Malaga Faamisionare, faatasi ai ma Simona Peteru, lea ua masalomia lona faamaoni, e pei o le manatu autu o lenei taeao. Peitai o Simona Peteru o se tagata faamaoni. E faapefea ona iloa lona faamaoni? Ua iloa i ana galuega sa faia mo Iesu. Faaitaiga, o lana lauga ia i latou uma sa potopoto i lea lava taimi, ma

liliu mai ai lo latou lē talitonu ia Iesu, a e mulimuli i talaiga o le Tala Lelei ia Keriso, e pei ona faamauiina i le Galuega 2. Faapea ma lona mafuta ma le latou aai faatasi ma Keriso, o le tagata o nuu ese, ma o se Taitai o le To'a selau o le Malo Roma, e pei ona faamauiina i le Galuega 10. O le tulaga na i'u i ai lea tala, o le papatisoina o Konelio e avea ma tagata kerisiano, e le Agaga o le Atua.

I le vaega o le Tusi sa faitauina, lea o loo talanoa mai ai Peteru i le fa'aaliga na ia vaaia, ma lona faamatalaina o lona uiga. O le fa'aaliga ina ia 'aue le faailoga tagata, auā e faamamāina tagata uma ua papatisoina e le Agaga o le Atua, e oo foi i tagata o nuu ese. O lo latou talitonu lea i le faaolataga na faia e Keriso mo le tagata salamō. Ona o le lotolotoi ai o le Agaga Paia o le Atua ma Peteru o le soo faamaoni o Iesu, lea na papatisoina ai i latou uma sa faalogologo i le faamatalaina o lea fa'aaliga, ma avea ma tagata talitonu i le Talalelei ia Keriso.

Atonu o le masalomia o le faamaoni o Peteru, e pei ona i ai le manatu autu o lenei taeao, e mafua ona o le faafiti faatolu o Peteru ia Iesu, ina ua agai Iesu i lona faasatauroina. O lea na ia tali ai, "Na te le iloina lona tagata," ina ua lamatia lona ola i le oti, ma ua fefe, ina ne'i te'i ua fasiotia ai foi ma ia. A e ina ua ulufale i ai le Agaga o le Atua ia Simona Peteru, ma suia ai lona tagata, ma lagona ai lona salamō, o lea na ia faamaoni ai i lana galuega tala'i, e avea ma soo faamaoni mo le tatou Faaola.

Le tatou mafutaga i lenei taeao, o le faamanatu ma le lu'itau o le Talalelei mo tatou, ia 'aue ne'i tatou taofiofi i o tatou tagata tuai, auā o tatou uma ua faafouina, ma faamamāina e le Atua, e ala ia Iesu Keriso. Ua tatou salamō ma ua papatisoina i tatou e le Agaga o le Atua, 'aue tatou te masalomia le faamaoni o tatou tagata. Silasila ane ia tatou galuega, ma tatou faatinoga uma ua faia mo Iesu, e pei ona valaauina ai i tatou uma. Pe o faamaoni, pe leai, le faatinoga o tatou galuega? Ma o le lu'i lona mo oe ma a'u i lenei taeao, e leo tele ma leo lelei i le faafofoga ma le silasila mai o le Atua, ia tatou galuega uma e faia mo Ia ma le Talalelei ia Keriso.

Mo nisi o loo masalomia le faamaoni o tatou tagata, e tataua ona silasila ia tatou galuega ma faatinoga uma, ma iloa ai, o tatou o ni tagata faamaoni ua valaauina mo le galuega a le Atua. E pei ona usuina le Fono

Tele o lenei tausaga, o lea ua potopoto mai le Ekalesia Aoa, ina ia toe faafouina le tatou papatisoina i le Agaga Paia, ina ia aveese ai le masalomia o le faamaoni o tatou tagata. O a tatou tapuaiga, faapea le tatou mafuta ai o le Au Kerisiano i Malua nei, faapea ma le talanoaina o mataupu folasia i lana Fono Tele, e aveese ai le masalosalo, a e faamautuina, o tatou tagata filifilia, ma tagata faamaoni, mo le Atua ma le Talalelei ia Keriso lo tatou Faaola.

O le atoaga o le alofa tunoa o le Atua, lea na auina mai ai Iesu Keriso lo tatou Faaola. Na tigaina ma sasaina, ma fasiotia ona o i tatou. O le alofa tunoa o le Atua o lea na faasatauroina Iesu, ma malie e fai ma togiola o a tatou agasala uma. O lona toetu manumalo mai le oti, ma suia ai o tatou tagata tuai, a e avea ai ma tagata fou, tatou te olioli ai i le Alofa tunoa o le Atua. Ia manuia tele le Fono Tele o lenei tausaga. Ia tumau i le Atua le viiga ma le faamanū, nei seia oo i le faavavau, faavavau lava. Amene.

Saunia Faletua ia Lemau A. Palaamo

Vaega Faamisionare

Ofisa Tutotonu EFKS.

FAAMOLEMOLE, IA AMANA'IA!

(Please acknowledge)

Roma 16:11 "Ua ou alofa atu i e o sa Nakiso..i le Alii"

E taualuga le Tusi a Paulo ia Roma, i le ta'ua o i latou uma na fai o latou sao i le galuega a le aposetolo. O loo tusia uma e le aposetolo o latou igoa taitasi, ma a latou galuega eseese sa fai, o la latou maa sa togi, o le 'aso sa velo ma le lau sa ato, i le galuega tele o le Tala Lelei. O le faailoga lea o le amanaia tele e le aposetolo o tagata taitoatasi, ma o latou sao, seanoa i latou nei, e le manuia le galuega a le aposetolo tainane le talaiga o le Tala Lelei.

O se faafitauli tele lea o aso nei - o le leai o se amanaiaina o i latou sa faia se galuega lelei, ma ta'ua ai o latou suafa ma a latou galuega sa fitaituga ai. E faasino tonu lenei mataupu i le faiva o tusitusiga, e pei o le Sulu Samoa. E i ai nisi ua latou fa'aoga ma toe kopi nisi o tusitusiga o le Sulu Samoa, aunoa ma se amanaia o le tusitala na ia ulua'i faia le galuega. E aofia ai i latou o loo latou fa'aoga mataupu o lomina i lenei Pepa a le EFKS, e saili ai o latou faailoga ma nisi faamanuiaga tau i latou lava. E ao ona faailoa, o le EFKS e ana le meatotino, ma o le EFKS foi e ana le pule e mafai ai ona toe kopi mataupu o lomina ai.

F. Tolua (Faatonu Sulu Samoa)

FAAPA'IA MAOTA FOU o le GALUEGA, EFKS AVATA

O le Aso Toonai mulimuli o Iuni, 27/6 na faia ai le sauniga e faapa'ia ai le Maota fou o le Galuega o le EFKS Avata i Falealupo, Itu o Tane. O le galuega o loo tausia e le susuga faafeagaiga taulagi ia Peia Lesatele FS ma le faletua ia Eseta. Na ta'ita'i le sauniga mamalu e le Toeaina o le Pulega Itu Asau, le Komiti Faatonu o le Matagaluega Itu o Tane susuga Amuia Seuala FT. O ia lava foi na saunia vaega uma o le sauniga - le faitauina o le Tusi Paia, o Talosaga faapea le Lauga. O le Tina o le Pulega ia Tiresa A. Seuala na ia ooti le lipine e tatala aloaia ai le galuega. A o le Tala o le Galuega na saunia lava ma saunoa i ai le susuga i le faafeagaiga ia Peia Lesatele e faapea:

Na fono le Aulotu ma autasi le faautaga i le tataui ai ona faia se fale fou o le galuega, e sui ai le maota tuai ua le toe saogalemu. Na fai le talosaga i le poloketi miliona a le Malo/Itumalo, sa talia ma faamatuu mai ai le \$30,000, na amata ai loa le galuega, ma faatau ai nisi oloa manaomia e pei o laulau ma nofoa. O le Aso Gafua 20 Oketopa 2025 na tuuina ai i lalo le maota tuai. O le Aso Gafua 10 Novema 2025 na amata ai le galuega mo le maota fou; sa malolo i aso fiafia ma toe fa'aauau ai i le aso 12 Ianuari 2026. Sa saili fesoasoani, ma tali mai le tasi Matafale o le Aulotu, afioga Aumua ma le faletua - le tofi faipule o le itumalo - afioga A'e'au Tima Leavai, e \$6,500.00, na totogi ai le aitalafu i le Blue Bird Lumber. Na savalia le Toomaga a le Ekalesia ma talia ai le \$80,000, ma faai'uina ai le galuega i le aso 11/3/26. O le tupe na fa'aaoga mai le Toomaga = \$71,502.00 Tupe mai le Poloketi Miliona Malo = \$30,000.00 Fesoasoani mai Matafale & Isi = \$9,123.30
O le tau atoa o le galuega: = **\$110,625.30**

Na saunoa le afioga i le Taitaifono o le Fono Tele, susuga i le Toeaina ia Palemia Tauiliili Reupena FT e fai ma sui o le Ekalesia Aoao e molioo le faamalo ma le faafetai i le susuga faafeagaiga ma le faletua ma le mamalu o le EFKS Avata, e tusa ma lo latou soifua faatuatua, galulue ma faitaulaga mo le Atua, e pei ona i ai lenei galuega. Na ia siitia mai le perofeta o Sakaria, o le uiga o lona igoa, **O le Atua e manatu mai; o le Atua na te manatua.** "Ua ta'ua e le

susuga i le faafeagaiga faafitauli sa feagai ai, o le ausage, to'a gaogao, tau auau ma'a ona o le mativa. A o tua atu o ia faafitauli, sa faamalumalu mai ai aao agalelei o le Atua - le Atua e manatu mai..ua afua ai ona tatou patipatia lenei aso fiafia. O lenei maota, ma isi maota e tele, o le malumalu, o galuega tetele ua faia mo le galuega o le Tala Lelei. Sa tapua'i mai lau Ekalesia, e pei o le upu, E tata matasilasila le Agaiotupu, a e se'e lili'a le Taufalemau. E momoli atu le agaga faamalo ma le faafetai."

"Soia le tau faanape le foe, ma manatu i le toaitiiti ma le mativa. O a'oa'oga a le Tusi Paia i le tele o vavega na faia e le Alii o Iesu, e afua mai i nai mea itiiti lava. E pei o nai areto ma i'a itiiti na tuu i ona aao, na maoona ai le to'a 5,000 o tane a e le'i faitaulia tina ma tamaiti, ma tutumu ai le 12 'ato o toega. O faiga na a le Alii, aua na te mafaia mea uma." Ona ia tauaao lea o le meaalofo a le Ekalesia Aoao e \$10,000, e tusa o faiga faavae a le Ekalesia, e tino ai lana tapuaiga ma le lagolago i galuega ma atina'e a Aulotu, Pulega ma Matagaluega.

Sa faapea foi ona faailoa le agaga fiafia ma le faafetai o le susuga i le Toeaina ia Amuia Seuala FT e tusa ma le galuega ua faapaia nei. Na ia apoapoa'i foi ma faamalos'i au: "O le faasinoga a le Tala Lelei, ia fai le galuega a le Atua, ona faamanuia mai lea o le Atua i le au galulue. E le mativa ai outou lima, tou te le oge mea ai, a e tupu atili ai lo outou malos'i, tou te iloa atili ai, le alofa silisili ese o le Atua ia te outou. Ua mae'a le galuega, a o i ai nisi laasaga, o i ai pea mea o totoe. E le uma le alofa o le Atua; o le a le to'a itiiti ma le to'a gaogao, ae faapei ona faia e le Atua i ona tagata, e faapea foi ona Ia faia ia te i tatou."

O le susuga Peia ma le faletua ia Eseta, na i'u mai Malua i le 2018, faau'u e avea ma Faifeau Samoa 2022, na valaauina e le EFKS Avata e avea mo latou faifeau ina ua penisione le susuga Gutu Faasau FS. O le EFKS Avata e tolu i ai aulotu i Falealupo, faatasi ai ma le EFKS Falealupo-uta o galulue ai le susuga Koroseta Semau FS ma le faletua ia Maria, ma le EFKS Vaotupua o galulue ai le susuga Namaia Kofe FS ma le faletua ia Pelemoni. Na tauluga le aso fiafia i le tausamaaga ma fa'aaloaloga faaleaganuu e masani ai i aso tetele faapenei. Ia faamanuia le Atua i le faafeagaiga ma le faletua ma le paia o le Ekalesia.

(F. Tolua)

FAAPAIA LE MALUMALU FOU EFKS PAPA PULEIA

“Afai e le atiina a’e e le Alii le fale, e galulue fua o e atiina a’e...”

O le Aso Tofi 25 Iuni sa amata ai le faamoemoe o le EFKS Papa Puleia e ala i Taalolo, a o le Aso Faraile 26 Iuni sa fai ai le sauniga e faapa’ia ai ma faaulufaleina ai le malumalu fou. O le EFKS Papa Puleia o loo galulue ai le susuga i le faafeagaiga ia Enoka Aperamo FS ma le faletua ia Susi. O le susuga i le Toeaina o le Pulega Palauli, o le Komiti Faatonu foi o ia o le Matagaluega Faasaleleaga, na ia ta’ita’i le sauniga mamalu, sa auai ma molimauina e le mamalu o le Ekalesia, le afioga i le Taitaifono Fono Tele ia Palemia Tauiliili Reupena FT ma le faletua ia Tuvale, susuga i Toeaina o le Matagaluega, le aufaigaluega faifeau ma latou faletua, ma le toatele o aiga uo, tainane le paia faalemalu i le afioga i le Tofi Faipule o le itumalo. O le faletua ia Tovale Palemia T. Reupena na ia ooti le lipine e aloaia ai le tatalaina o faitotoa o le malumalu, ma ulufale atu ai le Taitai o le Sauniga ma le mamalu o le faapotopotoga. O le susuga i le Failautusi o le Pulega, susuga Uili Konelio Te’o na saunia le Lauga o le sauniga.

O le Tala o le Galuega sa saunoa i ai le faafeagaiga taulagi, susuga Enoka Aperamo FS. Ina ua taunuu mai ma amata galulue i Papa Puleia i le 2021, o se tasi lenei o galuega na faama’alo e le ekalesia, e toe lava o Papa Puleia le falesa tuai o le Pulega o loo i ai. O le tali a le faifeau ia latou tapena ma faatino, pe sau se isi faifeau galue ma fa’aaoga, e le afaina a o lo latou tiute o le tapena lelei. Sa faamoemoe foi se’ia foi mai se uluai malologa ona faatino lea, peitai ua maitauina lava ua le saogalemu le malumalu mo tapuaiga. O le ala lea na amata ai loa ona tapena le Aulotu i le 17 ona Matafale, mo sailiga seleni ma faaputu mo le faamoemoe lelei. O le tausaga lava lea 2021 na fai ai le LULU seia oo i le amataga o le 2022. O le 2023 na fai ai le TAUSALA ta’i \$2,000 a le Matafale, ma toe faia foi i le 2024 ta’i \$1,000, a o le 2025 na faia ai le TAUSALA ONLINE.

O le tupe na amata ai le galuega	-	\$300,000
O tupe mai Tausala (e le’i teuina)	-	\$23,722
Asiga eseese	-	\$27,100
Tusitupe (Atina’e & Tausala)	-	\$108,230
Fesoasoani mai Fono Faavae	-	\$33,240
<i>(Afioga i le Faipule & Itumalo)</i>		
TUPE ATOA	-	\$492,292

O Tauofoga:

1. Faamalama (Alo ma Fanau Alo Sefo)	\$45,612
2. Faitoto’a (Fetalaiga Leato)	\$7,409
3. Moli (Lauama)	\$10,597
4. Ea Malulu (Mau Sefo)	\$26,000
5. Ili (Faumuina Fialii & Faletua)	\$4,515
6. Pulelaa (Aulavou)	\$15,000
7. Laulau Faamanatuga (Faletua ia Susi)	\$8,000
8. Faamalama Tetele	\$19,000
9. Tanuina ma faalaulelei le Lotoa	\$55,500

AOFAI O TAUOFOGA	\$191,713
AOFAI AITALAFU	\$357,019
TUPE AULOTU	\$492,292

TAU AOFA’I O LE GALUEGA \$1,041,024

O le aso 21 Setema 2025 na tuuina ai lalo le malumalu tuai, a o le aso 20 Iuni na mae’a ai, ina ua atoa le 10 masina po o le 44 vaiaso na faatino ai le galuega. O le afioga i le Matuaofaiva, o le susuga Mausii’isi’i Meaalofa Aiga Mausiiisii, o se itutino lava o le afioaga ma le ekalesia, e fai foi lana Matafale i le Aulotu. Na ia ta’utino i le amataga o le galuega, e leai sona totogi, ao lana taulaga lea ua ofoina ai le taleni mo le Atua, e ala i le soifua tautua ma lana auaunaga. O le tatalo a le faifeau i le aulotu, ina ia alofagia le afioga i le Matuaofaiva, ua tuua lana galuega masani, o lea ia tuuina atu pea se meaalofa o le a le mea e maua ia faitau ane ai. Ma o le tele o se seleni sa amata mai ai e \$500 i le vaiaso, ae uma ane le galuega pe a ma le \$200 pe \$100 i le vaiaso ma le faamanuia a le faifeau, ae sa talia ma le loto faafetai.

O le aufaigaluega o alo ma fanau lava a le ekalesia, o le aufaipese ma le aulavou lava lea. Sa maua ma le fiafia tele se meaalofa pe \$50 i le vaiaso, ae le’i faavaivaia ai le usu mai i aso taitasi. Sa faapea foi ona fesoasoani malosi mai nisi o uso, e ui ina e le aulotu ai; le afioga ia Ava Tusialofa Faumuina Loma, o Fiu mai Sili, ma se isi tamaitai. O le Faimoli o le afioga Leota Atonio ma ona alo. O le folaina o le maa ma kapeta, o le fetalaiga Tuisafi’a Talaleva ma ona alo. O le Pa o loo siomia ai le malumalu na fausia e Nofoituaiga Manu Lupeomanu mai Poutasi, a o teuteu o faamalama na saunia e Avaoga o se alo mai Poutasi. Ia faamanuia tele le Atua ma toe faatutumu le malosi ma le soifua laulelei ua fa’aaoga mo lenei vaega o lana galuega.

6. O LE SULU SAMOA IUNI 2026

O le afioga i le Taitaifono o le Fono Tele, susuga Palemia Tauiliili Reupena FT, na ia saunoa fai ma sui o le Ekalesia Aoao, e momoli le faamalo ma le faafetai tele i le susuga faafeagaiga ma le faletua, ma le mamalu o le Ekalesia i Papa Puleia, mo lenei galuega tele ma le matagofie. Faafetai le alolofa i le Atua, malo le faatuatua, i au osiga taulaga ua faia mo le viiga o lona suafa. O lana silasila ua fetau lelei le tau o le galuega, ma lona matagofie saunia lelei ua molimauina; mata sa tatau ona sili atu, peitai ona o le tele o vaega ofo fua mai, ua fai ma faamama avega i le tau o le galuega. E leai se isi e alu ma ave lenei malumalu i lona aiga, pe penisione foi le susuga ia Enoka ma le faletua, e tuu lava le malumalu e tapuai ai auga tupulaga fai a'e o Papa Puleia.

Na saunoa faafetai foi le Taitaifono Fono Tele i le Matuaofaiva ma le aufaigaluega sa feagai ma le galuega. Faafetai mo le fa'aogaina o le meaalofo taleni ma agavaa mo le galuega a le Atua. Ia saga faamanuia le Atua e ana le taleni, o ana meafaigaluega, ma ia aoga pea lona soifua mo le manuia o aiga aemaise le feau a le ekalesia. Ia vave mai foi le aso e tofia ai le Meana'itaua, e tautoalua ma faufautua a o feagai ai ma tiute. O le tulaga i le Aitalafu o le galuega, o le fautuaga a le Toeaina, a o silasila ma faafofoga le afioga i le Faipule o le Itumalo, ia tuu le talosaga i le Ofisa o le Fono Faavae o le Itumalo, o le tasi lea ona tiute o le lagolago ma fesoasoani i le galuega a le ekalesia i totonu o le itumalo. Faatasi ma ana faamalosi'au faalototele i le paia o le ekalesia, e le o tuulafoaiina e le Atua i latou, o e galulue ma le faamoemoe atu ia te Ia. Ia silafia foi o loo tatalo ma tapuai mai le Ekalesia Aoao a o latou alo faiva i le galuega. Ona ia tauaao lea o le meaalofo a le Ekalesia Aoao e \$20,000, e tusa ma ana Iugafono. Malo Faafetai.

O le susuga Enoka ma le faletua ia Susi na amata galulue i le EFKS Papa Puleia i le masina o Aperila 2021, e sui tulaga i le susuga Faamanuia Fa'aaliga FS na maliu i le 2020. Pe a tusa ma le pule faasoifua a le Atua aulia le tausaga fou 2027, ona alu lea o le la ulua'i malologa 3 masina e tusa ma le faavae o le Ekalesia. Na faai'u le aso fiafia o le ekalesia i tausamiga ma fa'aaloaloga mauualuluga e masani ai le EFKS i aso faapenei, o taulaga osi i le Atua e ala i tu ma aga fa'aaloalo a le atunuu. Ia faamanuia tele le Atua ma toe faatutumu mea ua faagaogao ona o lana galuega.

Saunia F. Tolua (mai ata a le EFKS TV).

MO TUPULAGA TALAVOU: **A E TE LE'I FAAIPOIPO**

"³E feoa'i faatasi ea se toalua, pe a le loto gatasi i la'ua?" Amosa 3.

O nai motugaafa nei mata e fesoasoani i lau filifiliga faatalavou, a e le'i faia lau faaiipoipoga: (1) E malosi le mafutaga a lau paaga ma Keriso? Ua fesili atu Amosa, ina ia vaai lelei i lau paaga ma lau uo o lua feoa'i, pe tutusa le tulaga o le lua Ola ia Keriso; po o tutusa le itu o lua savavali ai. (2) O tuputupu a'e ma ola lau paaga i le itu faaleagaga? *"Ia outou faateete... A ia tutupu outou i le alofa tunoa ma le poto i a lo tatou Alii, o lo tatou Faaola lea o Iesu Keriso" 2 Peteru 3:17-18.* Pe afai e te lua lē o tutupu faatasi, e i'u lava ina oulua tutupu eseese ma tutupu valavala. E mafai ona tuufaatasia oulua i foliga vaaia, mo na o se vaitaimi; a o le faatuatuaga ma amio lelei e umi, pe faavavau ona faatasia oulua. (3) O le a se ituaiga talaaga o lau paaga? E mafai ona fesoasoani le Atua e lavea'i feeseeseaiga mafua mai i ni vaivaiga o talaaga o tatou aiga ma tatou olaga. A e tatau ona e silafia lelei vaega uma, ma tulaga uma a e te le'i tali atu, *"Ioe, ua ou loto lava i ai, i le ma'i po o le maloloina, i le solo lelei po o le faigata"*.

O la le aposetolo, *"²Ia outou fesui ia outou avega e ave, ma ia faapea ona outou faia le tulafono a Keriso." Kala.6.* Peitai e tatau ona e iloa lelei muamua po o a ia avega o le a e tausoa, a e te le'i faia le tautoga e amo ai ma tausoa le mamafa i aso uma o lou ola. O e iloa talaaga o le ola tuai o lau paaga? *"¹⁷O lenei, afai o ia Keriso se tasi, o le tagata fou ia; ua mavae le ola tuai, faauta, ua oo mai le ola fou." 2 Kori.5.* E lē o lona uiga, e te ufiufi, pe e te pepelo i mea leaga sa fai ua te'a. O le mea e sili ona tāua, o le faailoa manino ma le loto mamā o mea uma, auā e leai se mea lilo i luma o le Atua. Pe afai lua te tau fai silafia le moni o talaaga o le tasi ma le isi, ma tau fai faamagalo, tau fai malamalama, ona le toe i ai lea o se malosiaga o le tuana'i na te faafefe pe faaluafesasi ai la oulua mafutaga i le taimi nei ma le lumanai. E leai se tagata e atoatoa, peitai e ao ona saili le faamaoni o itu uma, auā o mea e sili ma atoatoa e finagalo ai le Atua, e manuia ai faaiipoipoga ma aiga osia. Ia faamanuia le Atua i la oulua faigauo ma ia viia o la i le lua mafutaga.

F.Tolua

O I'A MAI LE UPEGA

“Au mai ia nisi i'a ua outou maua nei.” Ioane 20:10

AISEA NA AFIO MAI AI IESU, MAI LE ITUAIGA O IUTA? (soso'o mai le Sulu Samoa Me 2026)

Ona latou o lea ma ona uso i le aiga, na vaai atu Iuta a o latou loloi le ofu o Iosefa i le toto o le 'oti, ma ia tu ai i totonu o le fale, a o saei e lona tama ia Iakopo ona ofu ma tagi lotulotu ona o le atalii ia Iosefa, ua talitonu ai ua oti. Na iloa lelei e Iuta o loo ola le tama, peitai e leai sana tala na fai - i lona aso, ma le isi luasefulu tausaga mulimuli ane. O le gūgū sālō, o lona toilalo lona lua lea. Na faatetele atu i le luasefulu tausaga o ia vaai atu pea i le faanoanoa o lona tamā. O taimi uma sa ta'ua ai e Iakopo le igoa o Iosefa, o taimi uma e siitia ai e le toeaina lona faanoanoa ma tauave atu i le isi vaitau, sa taofia pea e Iuta le tala moni mata sa mafai ona faauma ai le faanoanoa o le tamā. Ae na ia filifili e taofiofi ma nanā. O le mamafa o lona sālō sa le'i natia mai ia te ia; o le fanua lona sa ia savali ai i aso uma.

Ona oo mai lea i le Kenese 38, o loo tatala i se laina fuaiupu e peisea'i o se faai'uga o le lauina o se faamasinoga: *“¹O ona po lava ia, na alu ifo ai Iuta na i ona uso, ua afe ane i le tagata o Atulama.”* Na ia matuā alu ese mai le aiga o le feagaiga. Na ia vavae ese o ia mai le aiga o lona tamā ma faia atu i se fafine Kanana, ua savali ese mai mea uma na fausia e lona tua'ā o Aperamo, o mea na fausia ai i ona autafa lona olaga atoa. O lona atalii ulumatua o Eru, sa amio leaga, ma aveese e le Atua lona ola. Sa faapena foi i le atalii lona lua, o Onani sa amio leaga, ma na aveese foi e le Atua lona ola. E tusa ma le tulafono o le tausī tama, e tataua ia Iuta ona ave lona atalii lona tolu o Sila ia Tamara, ina ia fa'auau le laina o le aiga. Ae na taofia e Iuta lona atalii o Sila, fai mai ia Tamara e faatali se'i matua le tama, ae sa le'i i ai sona faamoemoe e tuu atu Sila ne'i oti foi o ia. Na ia faia ma le mautinoa le faasalaga o si fafine ua leai se tane, i le faagaloina ma le soloiesea o lona igoa mai faamaumauga.

Na malamalama lelei Tamara i le mea na fai e Iuta, ona fai lea o lona gaioiga potu. Na ia tuu ese ona la'ei o le fafine faanoanoa, ofu lona ufimata, ma nofo i le auala sa malaga a'e ai Iuta. Sa le'i mate'ia e Iuta o Tamara lea, sa manatu o se fafine talitane, ona ia

alu ane lea ia te ia, ua la momoe, ma tuu ai ana mea totino – o le faamaufaaailoga, ma lona asoa, ma lona tootoo – sa faamau ai, a o faatali le tama'i 'oti na folafola. E lē faatauva nei meatotino; o faamau faailoga ia o lona tagata, ma le faatusa o lona pule ma lona tupuaga. Na ia tuuina atu ma le faatamala mo ni nai minute o tu'inanauga, ma avea ai faatusa o lona pule atoa, e pei o se fefaatauaiga e mafai ona ia faagalo gofie.

Ina ua maua tala ua ma'i to Tamara, ona tali atu lea o Iuta ma le malosī o lona pule faalauaitele: *“²⁴Au mai ia o ia, ina susunu”*. Ua na valaauina le faasalaga o le fafine i le agasala na la'ua fai faatasi i le tolu masina talu ai. Ona tula'i mai lea o Tamara ma le faamaufaaailoga, o le asoa, ma le tootoo o Iuta, na ia taofia pea e fai ma molimau. O la Tamara, “O mea totino ia a le tagata na ou ma'itaga ai.” Na malepe ai i nofoaga faitele le faafiaamitonu ma le faafoliga o Iuta. Sa le'i faafitia e Iuta le molimau a le fafine, ma lona tuua'iga o ia - ma o le mea aupito sili ona tūa lenei - o lona faamaoni e ta'utino lona sesē, ma ta'uleleia le amitonu a le isi tagata. *“²⁶Ua sili ona tonu lona amio i la'u...”* O le ulua'i mātogi lea, le ta'ei muamua, o le tagata na alu tausaga e tele o natia ona vaivaiga ma ufiufi ona toilalo, lea ua ta'utino leotele sona leaga e tasi. Sa leai sana upu e fai ina ua lafo Iosefa i le lua, leai se upu a o faanoanoa lona tamā, peitai iinei, ina ua faailoa faalauaitele molimau faasaga ia te ia, na ia ta'utino ai le mea moni. O lona ta'utinoga o le a ta'uvalea ai lona tamaliiaga, peitai e mulimuli ane, o le a tuuina atu ai ia te ia se mea e sili atu ona tūa ma matagofie.

Na fa'aaogā e le Atua se oge e fai ai se mea sa le'i mafaia e le luasefulu tausaga o le soifuaga masani ona fai. Na pa'ū le laumeavale i nuu uma o sasa'ē o le lalolagi. Na pau le nofoaga sa maua ai le saito o Aikupito, le nuu sa pulea e se ta'ita'i atamai, e malosī a o se tagata ese, sa le'i masalomia e le aiga o Iakopo. O lona tagata o Iosefa. Le uso sa faatau ese e Iuta mo le luasefulu tupe siliva, lea ua avea ma tagata tulaga lua i lē ua sili ona malosī ma tulaga maua luga i le lalolagi atoa; ma o le aiga na latou faaleaga ia te ia lea ua sauni e ulufale atu i lona faitotoa e asamo mo taumafa. Na malaga le au uso i Aikupito ma ifo ia Iosefa, faataunuu ai le miti sa fai ma pogai o le itagia

o ia e ona uso i le amataga. Na iloa lelei e Iosefa i latou i le taimi na feiloai ai, e ui ina sa la latou le'i maitauina o ia. Ona tofotofoga lea e Iosefa, ua tuua'iina o sipai, taofi ai Simeona, a e toe foi isi ma saito, ma le tuutuuga ia toe o mai ma aumai lo latou uso laitiiti o Peniamina, le tama a Rasela, ona latou toe feutagai lea. Na musu Iakopo; ua uma ona leiloa Iosefa, ua tele foi masina o taofia Simeona i Aikupito. Na te lē lavā ona leiloa atu ma Peniamina. Ua vaai le fanau a Lea, a o faasili le mafatia o Iakopo i fanau a Rasela nai lo Simeona o loo pagota i le toese, ma toe matalatala ai manu'anu'a tuai, e pei ona sa masani ai.

Mulimuli ane, ina ua matelaina le aiga i le fia 'ai, ua leai se alofaga ua leai se isi auala, ona tulai atu lea o Iuta. Na te le'i fesili i lona tamā; na ia ofo atu e fai ma faamaoniga: *"⁸Ona fai mai ai lea o Iuta ia Isaraelu lona tamā, Tuu mai ia le tama ia te au, ona matou tulai ai lea ma o, ina ia tatou ola a e le oti...⁹E fai a'u mona moni; e te saili mai o ia ia te au; afai ou te le toe au mai o ia ia te oe, ma tuu ia te ia i ou luma, ona ou nofo sala ai lea ia te oe i aso uma lava."* O le tagata na ia faatau lona lava uso, lenei ua na ofo atu e fai ma moni o le saogalemu o le uso, le atalii e sili ona pele i lo latou tamā. O le atalii lava lea e tasi na filifili i faasiliga o tamaoiga e sili atu nai lo le saogalemu, lea ua tuu atu lona ola ma lona lumanai atoa, e puipui ai le fanau a le isi fafine (Rasela), sa faitauina e sili atu nai lo lona lava tina (Lea). Ona latou toe o lea i Aikupito faatasi ma Peniamina.

Na talia i latou e Iosefa, na latou talisua, mulimuli ane i le toe tofotofoga, na tuu ai lana ipu auro faa'ofu'ofu i le taga saito a Peniamina, ma tuuina atu le au uso ia o. Ina ua toe maua le ipu, na toe faafoi uma le toa 10 i le potu o Iosefa; na lauina ai le i'uga faatasi ma ona fusiga o manu'a: *"Ua saoloto outou uma e o. Na o le tagata na maua ai le ipu o le a nofo e fai ma'u pologa, o Peniamina, le aupito itiiti, le tama e faigata ia Iakopo ona tuu atu, le tama na fai Iuta mona faamaoni."*

O le mea na sosoo ai, o se tasi o taimi aupito i tāua lea i le Feagaiga Tuai atoa, ma e seāseā ona faatāuina pe faamatalaina i le faamamafa e tatau ai. Mo sina minute, e leai se tasi na gai. E to'a sefulu tama tane sa tutula'i i totonu o le potu faamasino aupito maua i le lalolagi, ma o le sālō i lea taimi, sa avea

o se faataimuaga o se siilima po o se liliuina. Ona tula'i atu lea o Iuta. Na ia amata ona saunoa. Na ia faafeiloai i le taitai o nuu ese, le tagata o loo umia le paoa ma le pule ia i latou uma. Na te le'i finau mo le faamaoni o Peniamina, na te le'i lu'iina foi molimau na faailoa. A e na ia faamatala se tala. Na ia faamatala o lo latou tamā ua matua lava, ma o le ola o le tama lea o Peniamina o loo noatia faatasi ma le ola o le tamā, ma afai e le toe foi atu le tama, o le a mautinoa le oti o le tamā i le faanoanoa. Na ia faamatala le ofo na ia faia, ua avea ia ma faamaoni e faamau, ma e lē mafai ona ia foi fua aunoa ma le tama i lona tamā. Ona ia fai atu lea o upu na laulua ai le potu atoa: Ken 44, *"³³O lenei, ou te aioi atu, ia nofo a'u o lau auauna e fai ma pologa i lo'u alii e sui a'i le tama, a ia alu a'e le tama faatasi ma ona uso."* O le tagata lava lenei e tasi na ia fai ane, *"Ia tatou faatau atu o ia i sa Isamaeli."* Le tagata lenei na vaai atu o faanoanoa lona tamā i tausaga e luasefulu, aunoa ma lona tautala i le mea moni. Le tagata lenei na ia lafoai lona tootoo i le palapala o le auala, na lafoa'i mea uma e faamaonia ai lona tagata atoa mo sina mana'oga faatauvaā – le tagata lenei lea ua tula'i i totonu o le potu faamasino i nuu ese, ma ofo fua atu lona ola e puipui le ola o le atalii sa alofagia e lona tamā, e sili atu nai lo ia lava.

E lē na o se tulaga ua faaleleia po o se laalaa malie i luma o le amio le mea ua tupu; o le mea lenei e latalata i le oti ma le toe ola i totonu o le tagata e toatasi. **O le ulua'i lavea'i suitulaga lenei ua faamauiina i le Tusi Paia (*This is the first substitutionary atonement recorded in Scripture.*)** Le maturanu na soifua ai Lē tupuga mai ia Iuta, na te faia i luga o le satauro a Roma – e tula'i o ia mo le tagata ua faasalaina, ma na avea mo ia tuatuaia latou te le mafai ona tauave – lea na tusia iinei, i le faitau senituri o tausaga e le'i oo i Kalevaria, e le tagata ua gausia le olaga, ma ua i'u ina avea ma le tagata tonu sa fuafuaina i ai.

Sa le'i mafai e Iosefa ona taofiofi ona lagona. Na ia tuli ese tagata Aikupito uma mai le potu ae se'i tagi o ia. O loo faamauiina na ia tagi leotele ma sa lagona mai e Aikupito tuaoi ma oo atu ai le tala ia Farao. Ina ua tautala Iosefa mulimuli ane, o ana upu na filifilia o se tasi o ta'utinoga maoa'e i le Tusi Paia (Kene 45): *"³O a'u o Iosefa; o ola mai pea ea lo'u tamā?"* Sa le'i mafai e ona uso ona tali atu, ona o le atuatuvaale ua tetele. Na fai atu Iosefa, le tagata na

latou faalata, i le luasefulu ma le lua tausaga ua te'a, na fale puipui ma avea ma pologa, *"Aua ne'i tiga outou, pe fai ma mea leaga i o outou manatu ina ua outou faatau mai ia te a'u i le mea nei; auā na auina mai a'u e le Atua e muamua ia te outou e fai ma faaola."* Na toe faamaloloina le aiga sa faataotolia i le gasegase tuga. Peitai sa i ai le vaaiga e tasi na totoo: o le toeaina matua o taoto i le falaefu, i ona tofaga i Aikupito, o i ai ana toe upu taumavae, ma o upu e suia ai taualumaga o le lalolagi, ua faasino i lona atalii lona fa.

Ua selau fasefulu fitu tausaga o Iakopo, ma na ia iloa lelei ua lata ona oti. Ona ia valaau lea o ona atalii e toa sefulu ma le toalua ma fai atu i ai. E le o se faamavaega i loimata ma lagona ootia, peitai o folafolaga ma valoaga faaperofeta. O faamanuia ma faamalaia, o le faai'uga tonu o le olaga o le tagata sa ola ai, ma lona aafiaga o i latou e tupuga mai ai. Na ia muamua feiloai ma Reupena le ulumatua: *"Ua e osovale pei o le vai, e le faasili lava oe."* O le faai'uga na fai ina ua tuana'i le luasefulu tausaga talu ona fai le amio leaga, e le'i suia i le umi o le taimi. Na tautala atu Iakopo ia Simeona faatasi ma Levi: *"Ia fetuuina lo la ita tele lava ina ua la finau vale ai; ou te vavaeina i laua i le nuu o Iakopo, ou te faata'apeapeina i laua i Isaraelu."* E leai ni sauniga mamalu, leai ni upu faato'afilemu, na o faamaumaga mausalī o Sekema. O atalii muamua, lua ma le tolu na faasee ese atu aunoa ma se faamaulaloga.

Ona vaai atu lea o Iakopo i le atalii lona fa, le tagata i totonu o le potu e aupito umi le lisi o vaivaiga ma toilalo, ma na saunoa atu i ai i faamanuiaga e manino lelei, e faatulaga lelei ma maioio lelei i le gagana faaperofeta, e tolu afe tausaga o taumafai a'oa'o Iutaia ma faia'oga Kerisiano e faavasega ma faataatau, e lē uma lona tamaoiga ma lona uiga: *"Oe na Iuta, e viia oe e ou uso; e oo lou lima i ua o e ita ia te oe; e ifo ia te oe le fanau a lou tamā. O le tama'i leona Iuta; lo'u atalii e, na e alu a'e nai le mea na saeia; na ia taoto, na ia faapuga pei o le leona, e pei o se leona fafine; o ai se na te faalili ia te ia?"*

Ona ia saunoa lea i upu e loka ai le gafa ma le tuu faasolo o le laina tau le Mesia e faavavau: ***"E le avea le tootoo ia Iuta, po o le faipule ai ona***

vae seia maliu mai Sailo, e usiusitai foi atu nuu ia te ia." Manatunatu ane i le meafaitino na ta'ua e Iakopo: o le **tootoo** a le faipule (the ruler's staff). O le meafaitino lava lea na lafoa'i atu faaleiloga e Iuta i tafatafa o le auala pefua e totoi ai le fefaatauaiga sa le tatau ona ia auai. Le faatusa o lana pule, na ia fa'aaoga e pei o se mea faatauvaa e faigofie ona ia lafoa'i, lenei ua ia toe maua mai.

Na avea e le Atua le meafaitino tonu lena – le tootoo, le faailoga o le pule na lafoa'i e Iuta – ma na Ia folafola e le toe avea le tootoo ma le tofi faipule mai ia te ia, seia oo ina afio mai le tasi e fitoi tonu i ai. O le fuaitau lea, *"seia maliu mai Sailo"* (le Mesia, le Perenise o le Filemu), o se valoaga tu'usa'o faasino i le Mesia. O le a tumau pea le tootoo i le ituaiga o Iuta seia oo ina taunuu ma maliu mai le Tupu, le Suli moni, le Tofi ma le Faipule filifilia, mai le laina tuufaasolo o le gafa filifilia. Ua faitau seneturi o faitau ma silafia lelei e a'oa'o Iutaia ma Kerisiano i lenei fuaitau, e faasino i le lumana'i e afio mai ai se tasi e toatasi e faasino tonu i ai, i le aso ma le taimi tonu, mai se aiga patino tonu.

Na maua e Iosefa le faaluaina o faamanuiaga. Na ia nofo i le nofoalii o faiga malo Aikupito, ma maua le tausiga o faiga malo, o le faatumauina o le soifua o se auga tupulaga atoa mai le matelaina, ma le talaaga o lona soifua o loo faatumuina ai mataupu e sefulu ma le fa o Kenese. Peitai, e le'i faia mo ia le tootoo. O le pule faatupu, o le laina o le Mesia, o le nofoalii e faavavau, sa le'i tuuina atu i le atalii e sili ona pele ia Iakopo. O mea nei sa tuuina atu i le laina o le atalii, sa a'oa'oina i lona savalia o le ala e sili ona umi ma tiga o le aiga, na ia a'oa'oina ai le uiga moni, **o le tuuina atu o lona ola mo le isi tagata.** Na faasolo le laina i luma ia Faresa, le atalii na fanau mai i le mataupu ma Tamara, le mataupu sa faapea e faatama'ia atoatoa ai le agavaa o Iuta; o le laina faasolo ui atu ia Poasa, le tagata na laveai le fafine Moapi ia Ruta; e ala atu ia Iese, e ui atu ia Tavita le leoleo mamoe e faia ai e le Atua se feagaiga lona lua ma le ma'oti; e ala atu ia Solomona ma le laina faatupu o Ierusalem.

Sa le'i aunoa le laina ma ni faafatiatama'i e lamatia ai lona gausia ma le saogalemua. Sa tofotofoina i soo se augatupulaga, e silisili le ogaoga i taimi o lona ma'ale'ale. O le feagaiga ma Tavita, o faamauiina i le 2 Samuēl 7, o loo faavaapiapi atili ai le folafolaga

nai lo le faamanuia a Iakopo. Na fa'aali le perofeta o Natano ma ta'u i ai le feau e molioo ia Tavita: *"¹⁶O te faatumauina lou aiga ma lou malo e faavavau i o'u luma; e mausalī lou nofoalii e faavavau."* O le faamau po o le loka lona lua lenei o le laina o le Mesia. O le feagaiga na osia muamua ua le toe faasino i le ituaiga o Iuta; a ua faasino faapitoa i se aiga tautupu e tasi mai lena ituaiga, ma ua tuu i ai ma le upu, 'faavavau'. O le folafolaga ua avea o se fausaga; ua i ai ma le tuatusi.

I le tausaga 586 TLM, na faatafuna'iina ai e Nepukanesa II o Papelonía le aai o Ierusalemá, ina ua susunu le malumalu, faataape le nofoalii o Tavita, ma ave faatafea le aiga tupu i le tafeaga i Papelonía. I le maitau atu a le tala faasolopito i soo se itu, o le i'uga lena o lenei tala. O faigamalo latou te faaleaga faavae o pulega a isi tagata ua faatoilaloína, o lo latou faalēaogāina lava lea o le lumana'i o ia tagata. Na silafia lelei e Papelonía lenei mea; o se fuafuaga sa tapena mamao lelei, ae lē o se osofaiga na fai faafuase'i. Pe afai e leai se malumalu, leai se nofoalii, leai se aiga tupu, ua faamuta foi le fa'aauiaina o feagaiga osi. Mata sa manatu e mate ai le laina i Papelonía.

Peitai e leai, sa le'i mate ai. O le gafa o loo faamau e Mataio 1 ma le Luka 3, o loo tau fai faasolo ai le laina o le Mesia, e ui atu i le Tafeaga, i tagata e manino ma patino latou suafa, i le faasolosologa manino lelei, i le fitu sefulu tausaga o le tafeaga i Papelonía, ma isi senituri o pulega a Peresia, Eleni ma Roma sa mulimuli mai ai. Sa le'i motusia le vulu. E i ai nisi itu auiliili o loo finauina pea e nisi a'oa'o o le Tusi Paia. A o le mea e lē mafai ona finauina pe faasesēina e se tasi, o le faavae ma le faavaa o loo molimau e le au fai Evagelia: O le laina o Tavita, mai le laina o Iuta, mai le fanauga a Isaraelu, sa mausali ma tutumau, a o feagai ma lu'itau malolosi na tau'ai atu i ai e le lalolagi anamua.

O loo tala e Mataio le gafa faaletulafono e ui atu ia Iosefa, faamautuina ai faailoga tautupu o Iesu i totonu o le tu ma le aganuu o tulafono faa Iutaia. O Luka o loo ia faasolo atu le laina e tusa ma fanauga i la le tino, o le gafa tau ivi toto ma aano, o loo molimauina e ui atu ia Maria. O nei laina e lua e faatasia uma ia Iuta. E lua gafa e ui ina eseese talaaga, a e fesootai ma taunuu uma i le ituaiga e tasi, i le aiga tautupu e tasi, ma le feagaiga o folafolaga e tasi, lea na saunoa

i ai Iakopo i lona atalii lona fa, i Aikupito i le faitau afe o tausaga e le'i i ai se nuu e igoa o Peteleema. O le perofeta o Mika, na soifua ma na tusia le valoaga i le fitu senituri a e le'i fanaui Iesu, na ia faaigoa le aai: *"²A o oe, Peteleema-Efarata, e itiiti oe i le afe o Iuta, a e tupu mai ia te oe mo a'u o le na te fai ma faipule ia Isaraelu, o lona tupu mai talu mai anamuā lea, talu mai ona po o le vavau lava."* Mika 5. O le agelu na faailoa i leoleo mamoe i lena po na ia faaigoa le laina: *"O le aso nei ua fanaui ia te outou i le aai a Tavita le Faaola, o ia o Keriso le Alii."* O le aai a Tavita, le aai i totonu o le ituaiga o Iuta – o mea uma na valoia na manaomia e perofetaga ua i ai ua taunuu ma faamaonia.

O le sa'o lelei atoatoa o le faataunuuga o lenei valoaga e le o sina auiliiliga itiiti; a o le finauga atoa lava lena. O se laina e ui atu i le ituaiga e tasi mai le sefululua, mai le aiga e tasi mai totonu o lena ituaiga, mai le aai e tasi na faaigoa e le perofeta i le fitu selau tausaga e le'i fausia, le laina na mafai ona sao mai totonu o matagi ma afa faapolokiki, o pulega ma sauaga o tafeaga – e le o se ituaiga tala e tupu mai i se tuufaatasiga poo se faaputuga o mea pau lava ua fetau. Pe afai e le o lona uiga, o i ai se mea taua ma loloto, o lona uiga la, e leai se uiga.

Aisea na afio mai ai Iesu mai le ituaiga o Iuta, a e le o se isi atalii o Isaraelu? O le tali laualuga e faaletulafono ma faavaloaga. Na faaleaoga e Reupena lona tofi i se valea faapolokiki. O Simeona ma Levi na la'ua faaleaoga i la'ua i se gaioiga faasolitulafono mata'utia. Na pa'ū atu le faasologa i le atalii lona fa. Na faamautu i le taumavaega a Iakopo o se folafolaga faalelagi. Na saga faamausali i le feagaiga ma Tavita ma folafolaga patino. Na faamaonia e le gafa o faamaumauga o le tala faasolopito. Saga faamautu e le perofeta o Mika i ana valoaga, ae faamausali e Peteleema i le nofoaga ma le taimi na soifua mai ai Iesu. O le tali faaletulafono lena, ma e atoatoa lelei.

Peitai e i ai se isi tali e loloto o i lalo ifo o lena faaletulafono, ma o le tali sa taumafai lenei tala e taula'i i ai mafaufauga, mai le taimi na vaai ai Iuta i lona uso a o i ai i lalo o le lua ma na tautala ai i na upu. E le'i totōina e le Atua le laina o le Mesia e ala mai ia Iuta e ui ina sa i ai ona toilalo. A e na la faau mai ai i lena laina ona o fua na tutupu mai ai i na toilalo. Auā soo se tagata e le'i pa'ū ma toilalo, na te

lē iloa pe lagona le tau o le toe tula'i i luga. Auā o se tagata na te le'i faatauina atu se isi uso sa tataua ona ia puipua, na te lē malamalama i le uiga o le tula'i atu e fai ma sui o le tagata faasalaina. Auā o le vaega o le tala i le Kenese 44 – lea na tu atu ai Iuta e fai ma pagota e sui ai le atalii sa sili ona pele i lona tamā – o ni upu ma se gaioiga e fai e na o se tagata, e malamalama lelei mai totonu, o le uiga o lona faia o le tuufaafegai.

O loo ta'ua Tamara i le gafa a Mataio. Sa mamafa i le finagalo o le Atua le anoa o lenei tala, ina ua tatala e Mataio lana molimau i le gafa o Iesu Keriso, o tusia ai ma le igoa o Tamara. Na te le'i faia lea ina ia faaufiufi le matagā, peita'i ina ia faalauiloa, ina ia ta'u mai ai i le itulau muamua o le Tala Lelei: "O le ituaiga tala lenei ou te faia. O le ituaiga tagata lenei ou te galue ai." Le tagata e malepelepe, ua faailoa lona masofasofa, le tamaloa na i'u lona tootoo i le palapala, le fafine na taumafai le tulafono e susunu – o tagata nei e le'i ai faafuase'i. O i latou o tagata faamataupu silisili faasino i le natura o le laina tautoto lava ia. E le'i filifili e le Atua se laina mamā ma taumafai e puipua mai le pisia ma faaleagaina; ae na Ia filifili le laina o tagata e i ai vaivaiga, ma na lavea'i ina i soo se taimi e toilalo ai. O mea leaga e lē o ni vaega o le tala; a o mea leaga o le autu lena.

O le a setuana'i o lou olaga – le taimi o le lua e leai ni vai, le Kenese 38, le taimi na e savali ese ai mai tagata uma samana'omiaoe – ua mautu ai lou manatu e te lē agavaa i le fa'aaogaina o oe e le Atua? O le Leona o Iuta e le'i auala mai i se gafa e atoatoa. Na Ia filifili le malepelepe. Na Ia auala mai le atalii lona fa e lē agavaa, e lē ui lava i mea na faia e lena atalii, a o le ituaiga tagata na i'u mulimuli i ai. Na Ia faia fuafua lelei ina ia ta'u mai ai se feau e le mafai ona faailoa i se isi lava auala: "Ou te le'i sau mo le ulumatua. Ou te le'i sau mo i latou e le'i toilalo ma le'i pa'u'ū. Na ou sau mo i latou na faatau ese atu o latou uso, na lafoa'i o latou aiga, lafoa'i o latou tootoo i le auala pefu, ma ola i tausaga e tele ma tauamo avega mamafa o mea e le mafai ona latou toe faafoi maia." Na ou sau e fai le mea tonu na fai e Iuta mo Peniamina, i totonu o le potu i Aikupito: ou te tu, fai mou sui, i lou tulaga.

Tusia F. Tolua

NA O AFIGA E TULEI MAI

SAOLOTO MAI LE TA'USALAINA MA LE FAASALAINA

"¹⁰Ua lafo i lalo le na molia o tatou uso, o le na molia i latou i luma o lo tatou Atua i le ao ma le po." Fa'aaliga 12.

Ua ta'ua Satani "o lē molia o tatou uso" auā na te taumafai pea e faamanatu mai ia i tatou mea uma e sesē na tatou faia. Aiseā? Ina ia alu uma lo tatou malos i taimi ua te'a, ma leai ai so tatou malos o totoo e mafaufau ai ma moe miti ai i mea tetele e faia e le Atua, pe faataunuu ai o tatou faamoemoega tetele mai le Atua i le lumana'i. O le itu lenei e malie ai ana moliaga ma tuuaiga: na te tuua faalelei, na te lē tagofia a tatou agasala e le'i ta'ua pe ta'utinoina.

E sili ia te ia le 'aia le faia se upu poo se tala i agasala e le'i ta'utinoina pe faailoaina. O ana moliaga ma tuuaiga e faasino tonu i agasala ua ta'utino – agasala ua uma ona faamagaloina. O le mafuaaga lena e ta'ua ai ana moliaga o moliaga sesē; auā o agasala ua uma ona faamagaloina. Se'i taofi teisi lava a e se'i faamanino faamaoti le eseese. O le faasalaina, o le lagona leaga lea i luga o agasala ua uma ona faamagaloina; a o le ta'utinoina, o le lagona leaga lea i luga o agasala e le'i ta'utinoina (Condemnation is feeling guilty over confessed sin, whereas conviction is feeling guilty over unconfessed sin).

O le ta'utinoina o le auala tatou te lelei ai ma le Atua ma aga'i ai pea i luma i le soifuaga. O le mea lea, ia a'oa'oina i tatou e faalogo ai pea i le siufofoga o le Agaga Paia, ma faate'a ese le leo faasalaina mai o le fili. O la le Tusi Paia, "⁹Afai tatou te ta'u atu a tatou agasala, e faamaoni o ia, ma le amiotonu e faamagalo ai a tatou agasala, ma faamamā mai ia i tatou i amioletonu uma lava." 1 Ioane 1. Pe afai tatou te ta'utino o tatou e mamā, ona ta'usalaina lea o i tatou e tusa ma moliaga. E oo lava i le Alii o Iesu lo tatou Puluva e le mafai ona Ia puipua i tatou. Peita'i afai tatou te ta'utino atu lo tatou agasala e tusa ona molia i tatou, e ta'usa'oina i tatou ma mamā, ma tatou saofaga ai i le puipuga malu a lo tatou Atua. O faamaumaga uma o lo tatou leaga o le a soloieseina. E leai se isi faamasinoga lona lua i luma o le Atua. E le mafai ona molia faalua oe, pe faamasinoina faalua mo se agasala e tasi. O le taimi e ta'utino ai le agasala, o le taimi foi lena e

faamagaloina ai, e faagalo ma faate'a ma faauma atoatoa ai. O le Alo o le Atua aunoa sana agasala, na Ia faia mo Ia le tuuaiga, na Ia talia le tiga o le faasalaga, na fai mo Ia le inosia ma le ta'uvalea o lo tatou leaga. *"⁵Ua outou iloa foi na fa'aalia o Ia ina ia aveeseina e Ia a tatou agasala; e le o ia te Ia foi se agasala."* 1 Ioane 3. A o tatou i ai i lenei masina o Iuni e faamanatu lo tatou saolotoga faalemalo, ia sili atu ona mamalu le faasaolotoina o tatou loto ma agaga, mai le ta'usalaina e le tiapolo, mai agasala ua uma ona faamagaloina e lo tatou Alii.

SAOLOTO MAI LE LUMA O **ANANAFI**

"Ona fetalai mai ai lea o le Alii ia Iosua, "O le aso nei ua ou aveeseina ai le luma o Aikupito ia te outou." Iosua 5.

E tasi le aso na aveeseina ai Isaraelu e le Atua mai Aikupito, peitai e 40 tausaga le umi na aveese ai le luma o Aikupito mai lona nuu. Na tupu lea mea i le nofoaga e igoa o Kilikala, e 381 maila i le itu matu sasa'e o Aikupito. Sa ola le nuu, mafaufau ma amio e pei o pologa, sa masani ai faaAikupito. E faigata ona suia faafuase'i se faagasologa o se soifuaga mai le 400 tausaga o nofo pologa. O le faatinoga o le saolotoga na tupu i le Esoto. Peitai, o Kilikala na faato'a mafai ai ona latou tuua le olaga tuai i le nofoaga e tataua ona tuu ai – tuu i le tuanai i Aikupito (Iosua 5). *"Ona fetalai mai ai lea o le Alii ia Iosua, O le aso nei ua ou aveeseina ai le luma o Aikupito ia te outou; o le mea lea ua faaigoa ai lea mea o Kilikala, ua oo i le aso nei."*

Mo nisi o tatou le au kerisiano, e faitau tausagā o taumafai e faate'a ese lagona o le ta'usalaina, ma faate'a ese lagona o aafiaga mai agasala o ananafi, o lagona o le faalumaina faapologaina i le tuana'i. O le tala fiala ma le lelei, e mafai e le Atua ona tulei ese le luma o lo tatou ananafi. *"¹O lenei, ua leai se faasala i e o ia Keriso Iesu. ("There is therefore now no condemnation for those who are in Christ Jesus") Roma 8.* E faamamafa le taimi nei; o le faamagaloga atoatoa o le mea moni ua tupu, i le taimi nei lava, i le nofoaga tonu nei lava, lo tatou Kilikala. Pe afai ua e ia Keriso, e le toe faamatalaina oe i mea leaga sa e faia; a ua faamatalaina oe i le mea ua faia e Keriso mo oe. O oe ma a'u o le tagata fou, peitai e umi se taimi mo lo tatou tulaga fou lenei e goto ifo i loto ma agaga. Na afio mai Keriso ina ia faasaoloto

i tatou, ia tuu o tatou tuanai i le mea e tataua ona tuu ai – o ananafi i le tuanai. Ma e tataua ia i tatou ona tuu ai iina. E faapefea ona fai? Ina ia e vaai ifo ma ou vaai ifo i o tatou tagata, e pei ona silasila mai le Atua ia i tatou – ua ta' uamitonuina. *"²¹Auā o Lē na lē iloa le agasala, na faia o Ia e le Atua ma agasala, mo i tatou; ina ia avea i tatou ma amiotonu a le Atua ia te Ia."* 2 Kori.5. Ia soia le vaai ia i tatou o oofu i le faalumaina, a ia amata ona tatou vaai ia i tatou e tusa ona sisila mai fofoga o le Atua ia i tatou: ua faaofuina i le amiotonu o Keriso. O nai mafaufauga faaleagaga, a o tatou faamanatu ma le loto faafetai, lo tatou saoloto mai le nofo kolone.

IA MATUA ATU, I LO FAAFITAULI

A e le'i tuua e Paulo ta'ita'i o le ekalesia i Efeso mo le taimi mulimuli, na ia fai atu ia i latou, *"O loo molitino mai e le Agaga Paia i lea aai ma lea aai, o loo faapea mai, ua faatali mai noanoaga ma puapuaga ia te au. A ou te le manatua se tasi mea, o lo'u lava ola foi ou te le naunau i ai, se'i o'u faauma lo'u momo'e ma le olioli, atoa ma le faiva ua ou maua mai le Alii o Iesu."* Galu. 20:23-24. E lua auala e faafetaia'i ai faafitauli:

1 **Tatalo ma le faatuatua i le Atua na te aveese,** e pei ona sa Ia faia i pa o Ieriko.

2 **Ia e matua atu (outgrow)** nai lo le faafitauli.

I le vaitau o le 1920, na ta'ita'iina ai e le alii Egelani o Malori se malaga e a'ea le Mauga o Everesi. Na toilalo ana taumafaiga muamua ma lona lua. I lona tolu o ana taumafaiga, na tafefea ma tanumia le toatele o lana aumalaga i se solo aisa. Ina ua latou toe foi i Egelani, o le toaitiiti na totoe na latou faia se sauniga faapitoa e manatua ai Malori ma i latou na malilili. A o tula'i atu le ta'ita'i o e na sao mai e saunoa, na ia vaavaai solo i le potu i ata o Malori ma isi na malilili.

Ona u lea o lona tua i tagata, ae faasaga atu i se ata tele o le Mauga Everesi, na tautau mai i tua atu o le laulau taumafataga, e pei o se sau'ai mata'utia e lē mafai ona faatoilaloina. Na maligi ona loimata, a o ia fai atu i le sau'ai, e fai ma sui o ana uo ua fano: "Ou te fai atu ia te oe, Mauga Everesi, i le suafa o alii ma tamaitai totoa uma o loo soifua mai ma i latou e le'i fananau mai. Mauga Everesi, na e faatoilaloina i matou muamua, faatoilalo faalua, faatoilalo faatolu. Peitai e i ai le aso e faatoilaloina ai oe, auā e gata lou tupu, e te lē mafai ona tupu atili i luga. A e matou te mafai. O le faamanatu, ina ia sili atu lou tupu a'e, nai lo le faafitauli.

(F. Tolua)

TALA O E UA FAI I LAGI LE FOLAUGA

SILAULELEI TAITO

TOOMALATAI

26/2/1934 - 16/6/2026

O upu o le Pese 175 a le EFKS e faapea, “*Ave lo’u ola ia aogâ, le Alii ei au feau.*” Ua fetau lelei lea Pese i le soifuaga o lenei Tinā. O Silaulelei Taito Toomalatai o le Tiakono Tina a le Aulotu i Vaivasetai, na matuā ofoina lona soifua e auauna ai i le Atua i lona tofi tiakono, ua valaau i ai lona Matai i le 92 tausaga o lona soifua. Taimi o lona malosi, e lē misi i sauniga o le Aso Sa, Lotu a le Mafutaga Tina, fonotaga Mafutaga Tina, Potopotoga a le Pulega, Tofiga Pulega ma le Matagaluega. Faatoā lē mafai lava ona toe auai mai Silaulelei i polokalame a le Aulotu ma le Pulega i le 2 tausaga talu ai, ona ua lē toe atoatoa lona malosi.

O le Lotu Faamanatu a le Aulotu e fai i tausaga taitasi i le Aso 27 Iulai, e filifili ai se tasi o le au matutua e saunoa faalaeiau ma faamalosi. O Silaulelei na faalaeiau i le Lotu Faamanatu o le 2021, i le atoaga o le 53 tausaga o le Lotu Faamanatu. O lotu o le vaeluaga o le Tausaga Fou i tausaga taitasi, e ofo mai ai se sui tina, sui o tamā ma se sui o tupulaga talavou e faaleoina tatalo faafetai, faatoesega ma manaoga. Afai lava e lotu Silaulelei i nei lotu o le vaeluaga, o ia lava e tele ina fai ma sui o tina e tatalo. O faailoga ia o le tagata ua mafana le la mafutaga ma le Alii. E tiga foi ona lē toe saofia mai i sauniga faitele, a e fai mai lava pe a feiloai i le ma asiasiga, e avatu ni ana Tusi Fai Lotu, Tusi Faitau Aso, Autaumafai, Auleoleo ma Sulu Samoa.

O se tagata foi e fiafia e faitau le Tusi Paia. Tele lava o taimi ma te o atu ai ma Agape i le ma asiasiga, o la e faitau lana Tusi Paia, *ona ou fai lea i ai, o le faafia ai lea ona soo lau faitau i le Tusi Paia atoa?* A e na o le ata lava ma si ona leo pei e tau fa, *“e na o le pau a lea o le mea e fa’aaoga ai lona taimi.”*

O se tagata e tausi faifeau, taimi a o malosi e tei lava ua tu mai ma se faatauga, o lana tala, *“o le tou faatauga lena ma tamaiti, leaga e toatele le lua fanau, a e ona o a’u le Tumasina o lenei masina.”* E iloa foi lona tausi faifeau, pe a ma ō atu e asiasi, po o le a lava se tupe ua leva na sulu i autafa o le moega, e aumai lava ma māua pe a matou faamavae, a le o lena o se tagapepa meaai e aumai ma le ma fanau.

O Silaulelei, o le leo fale lea a le latou aiga, tele o taimi ma te asiasi atu ai, e na o ia lava o loo taotooto i lona tofaga. O le ma asiasiga o Fepuari i lenei tausaga, na matou feiloai ma talanoa, a e tei ua fai mai o nei e atoa i ai lona 92 tausaga, pe mafai ona usu se pese o lona aso fanau, ia na usu lava lea ole matou Happy Birthday i lea aso.

O ona toe sauniga na faia i le 9.00am, Aso Lulu 24 Iuni 2026, i le Malumalu a lana Ekalesia EFKS i Vaivase-Tai. O le Susuga ia Leefu Pule (FS) na faaulufaleina lona sa, o le Faitauina o le Tusi Paia sa fofogaina e le Susuga ia Malotau Lafolafoga (FS), o Talosaga sa faaleoina e Ailani Tanielu (FS), a o a’u sa ta’ita’i ma saunia lona molimau faaleagaga faapea ma le feau faamafanafana.

Sa filifilia ai le Tusi o le faasinoga a le Tusi Faitau Aso, Esekielu 8:6, *“Ua fetalai mai foi o ia ia te a’u, Le atalii e o le tagata, ua e iloa ea mea o loo faia e i latou?”* And he said to me, *“Son of man, do you see what they are doing?”* Sa faatauaina ai pea le mafauauga faaleagaga o lea aso, ia fai se faatatau i ai (*Dealing with it*).

O le faitauga o lea aso, o loo fa’aalia ai le loto tiga o le Atua ina ua liliu ese lona nuu ma mulimuli atu i isi atua ese. Na fa’aali atu e le Atua ia Esekielu mea sa faia faalilolilo e tagata, ma sa ia valaauina i latou e toe foi atu ia te Ia. E lē na o le silasila o le Atua i mea sa faia e tagata, a e sa Ia finagalo foi ia malamalama le perofeta o Esekielu, i le tāua ma le i’uga o na mea. O lona uiga, sa valaauina Esekielu - e fai sana faatatau i mea sa ia vaaia.

O le valaau paia a le Atua i lo tatou Tina matua ia Silaulelei, e lē na o le vaavaai atu i le maliu o se tagata ma faanoanoa ai; pe na o le manatuaina o aso ua mavae o le mafutaga ma le Tina, a e ia tatou saili foi po o le ā le feau, o loo finagalo le Atua e a’oa’o mai ai iā i tatou, a o se aso foi e tatau ona tatou fai ai se faatatau i ai.

O le fuli mai o le tua o lo tatou tina ia Silaulelei, e lē gata o se taimi e faanoanoa ai, a e ose avanoa foi e fai ai se faatatau i o tatou lava loto. Fai se faatatau i le puupuu o le ola. Fai se faatatau i le soifuaga matagofie sa soifua ai lo tatou tina. Fai se faatatau i lou lava tulaga i luma o le Atua.

Aua ne’i gata lenei sauniga i le tagi ma le faanoanoa, a ia aveia ma taimi e toe fafagu ai o tatou loto, ia vaai i le uiga o le olaga, toe iloilo ai o tatou ala, toe faamalosi ai lo tatou faatuatua ma ola i se olaga e

viia ai le Atua. Ua mae'a le tautua a Silaulelei i lona aiga ma lona Atua. A o i tatou o loo totoe ma ola pea, ia tatou a'oa'o ni lesona ua tuua e le Tina: Ia ola i se olaga e aogā, ia tumau i le faatuatua, ma ia sauni i taimi uma mo le valaau paia a le Atua. "*O le mea lea, ia tatou faia se faatatau i ai.*" Na mae'a ona toe sauniga, ona lagomau lea i lona oliolisaga tumau i lona aiga i Lotopa. Manuia lau malaga Silaulelei Taito Toomalatai.

Saunia susuga Seilala Seilala (FS)

EFKS Vaivase-Tai

Matagaluega VAIMAUGA

TI'A PAULI TUIAEA

FOTUAAUPULE TAETAFA

1949 - 2026

O le afioga ia Ti'a Pauli Fotuaaupule o le tiakono matua o le EFKS Foua Salelologa, le ekalesia o tausia e le susuga Valaauina Taumua FS ma le faletua ia Veronica Taumua. Na soifua mai le afioga ia Ti'a Pauli Fotu i le Aso Sa, 9 Ianuari 1949, a e na valaauina e lona Matai i le Aso Tofi, 14 Me 2026 (a o usuia le Fono Tele a le Ekalesia i Malua); ua atoa ai le 77 tausaga, 4 masina ma le 6 aso o lona soifua. O ona tua'a o le Fetalaiga Pauli Taetafa o Salelologa le tama, a o lona tina o Nuu i Foua Salelologa. E maliu le afioga Ti'a Pauli o loo nofo toatasi pea, e le'i faia sana ava; peitai o loo faatama i ai fanau a nai ona tuafafine o Susana Kelsall, Malepe Pupi ma Fuifui, faapea le toatele o isi alo ma fanau a le aiga.

O lona soifua a'oa'oina o le Tulaga Lua a Salelologa na a'oga ai, ona amata lea ona faigaluega o le seila i vaa karasini, ma le tausiga o lona aiga i Foua. Na i'u ina faae'e i ai le suafa Pauli e le aiga o lona tama, ona o lana tautua. Sa avea lava o ia ma failauga faamoemoeina o le aiga sa Ti'a i ana faalavelave ma le tausiga o upu fai o le aiga i lona suafa Pauli. O le tausaga 2024 na faaecaina ai i le suafa Ti'a o lo matou aiga. O molimau o lona soifua, e tagatasi i se tama e tau le lagona lona si'ufofoga, ae alofa faamaoni ma galue malosi e le gata i lona aiga, a e faapea foi i le galuega a le Alii, e ala i lona tofi Tiakono. Peita'i, o lona vaivaiga e tasi sa taumafai malosi lana feagaiga

ma lona aiga ina ia faaitiitia, ia pulea lelei ma ia taofia, o lona taumafa 'ava oona. O lona lea vaivaiga e tasi, ma le auala sa fa'aalu ma'imaui ai le tele o lona malosi ma tamaoiga na te maua. Ui i lea, o se auala foi ma se avanoa sa ia mauaina ai nisi tupulaga, o alo ma fanau a le nuu, na te fautuaina ai i latou i le soifuaga lelei e lavea'iina ai i latou mai soliga tulafono ma le oo atu i le toese. O Ti'a Pauli o se tama sa inaina tele i le fa'aaogaina o fualaau oona faasaina, ina ia 'alo'alo mamao ese ai tupulaga a le aiga ma le nuu.

Na aveese mai lona tino maliu mai le Fale Maliu o Sefo Pa'u i Fusi Safotulafai, i le Aso Lulu 27 Me i le 7.00 taeao. O lana feagaiga le susuga Valaauina Taumua FS na ia ta'ita'i le sauniga puupuu, na faia le Tatalo ma momoli atu ai lona sa i lona aiga i Foua Salelologa, momoli sa'o i le malumalu o lana ekalesia sa tautua ai, le EFKS Foua Salelologa, ma faia ai lona toe sauniga. O le susuga Valaauina Taumua FS sa ta'ita'iina lea sauniga, ma lagolago i ai faafeagaiga a Tapaau ma Salelologa o galulue i Foua; o le susuga Faifeau Faalapotopotoga a le Atua ma le Fesoasoani Katoliko. O le susuga Alesana Afamasaga FS na faaulufaleina lona sa; o le susuga Letaulau Pesaleli FS na molimau, faatasi ai ma le susuga i le A'oa'o Fesoasoani ia Ti'a Lauaki Fuatau AF sa fai ma sui o le Aiga sa Ti'a i Lautala, ma le toatele o le aiga sa tausia mai e lenei tama o le aiga.

O Ti'a Pauli Fotu o se tama o le nuu sa lagolagoina le tele o faamoemoega o alo ma fanau a le nuu, i soo se taaloga. O se lagolago malosi i au taalo lakapi, soka ma volipolo ma soo se taaloga, faapea i au taalo a le Aulotu ma le aufili a le Matagaluega, a o fai Taaloga a Autalavou Aoao, e pei ona sa siamupini soo ai le Matagaluega Faasaleleaga. Sa iloga lona lagolago malosi i le Komiti, le Kapeteni ma le Aualo o le sa Fautasi ta'uta'ua o le nuu, le Tolotolo o Tamauli. O se tama sa iloga lona fiafia ma faamalosi i le uso kapeteni ia Pauli Ivan ma le aualo, i soo se faagatama sa feagai ai le sa o le afioaga o Ti'a ma Luamanuvae. Na faai'u ona toe sauniga i lona oliolisaga tumau i lona aiga lava i Lautala Foua Salelologa, sa ta'ita'iina e lana feagaiga taulagi ia Valaauina Taumua FS, ma matou faamavae atu ai i le Pese Taumavae a le Au Kerisiano. Ona faai'u lea o lona aso fiafia i fa'aaloaloga masani, sa tu tootoo ai le fetalaiga Matafai Tanielu Titifa. Ia manuia lau malaga lau afioga i le Tiakono, Ti'a Pauli Fotu.


Saunia Faitoaga Tolua FS

ATA O E UA MALILIU & ATA o TALA TUSIA

SILAULELEI IVA TAITO
TOOMALATAI



TI'A PAULI FOTUAAUPULE
TUIAEA TAETAFA



Nisi o le EFKS Avata i luma o le Maota fou.



Enoka & Susi Aperaamo, EFKS Papa Puleia.